

UniSZA perlukan RM300 juta untuk pembangunan semula universiti

KUALA TERENGGANU

Dalam usaha mencapai sebuah kampus terbaik bagi tempoh 10 tahun akan datang, Universiti Sultan Zainal Abidin (UniSZA) kampus Gong Badak memerlukan peruntukan kira-kira RM300 juta bagi tujuan pembangunan.

Naib Canselor UniSZA, Profesor Datuk Dr Yahaya Ibrahim berkata, sebanyak 30 peratus daripada lebih kurang 30 buah bangunan lama di UniSZA terpaksa dirobohkan akibatnya bangunan berkenaan tidak lagi selamat untuk digunakan.

"Saya sedar, dalam bajet baru-baru ini tidak disebut mengenai pembangunan universiti dan hanya untuk

sekolah, bagaimanapun, saya akan minta peruntukan untuk UniSZA sebagai sebuah institusi pengajian tinggi yang dibangunkan atas tapak bangunan lama.

"Kita (UniSZA) masih memerlukan banyak peruntukan untuk pembangunan semula universiti. Masalah ini juga dapat menjelaskan penyelidikan yang universiti buat kerana tanpa bangunan, kajian tidak dapat dilaksanakan dengan baik, mana nak letak peralatan semua kalau atap bocor dan sebagainya" katanya.

Yahaya berkata, bangunan lama sudah banyak yang bocor, siling runtuh, bilik kuliah tanpa LCD dan banyak lagi masalah-masalah lain yang memaksa

pihaknya membuat keputusan untuk merobohkan beberapa bangunan lama yang tidak selamat digunakan.

Katanya, RM300 juta itu perlu digunakan bagi kerja-kerja baik pulih bangunan sejia ada dan membangunkan beberapa bangunan baharu.

Begitu juga dengan bangunan fakulti, UniSZA yang sebelum ini mempunyai enam fakulti, kini sudah mencapai 11 fakulti tetapi lima lagi fakulti baharu terpaksa menggunakan bangunan lama.

"Bilik kuliah juga sama, perlu dibaik pulih dari segi peralatan seperti kerusi dan meja. Bangunan memang tak boleh nak buat apa dah, ada bangunan yang tak boleh guna sebab

atap bocor," katanya lagi.

Berhubung penginapan pula, pihak universiti terpaksa mengenal pasti rumah kediaman untuk dijadikan asrama bagi kampus Gong Badak bagi menampung jumlah pelajar yang semakin padat.

"Setakat ini kita sedang mencari rumah kediaman di luar kampus untuk UniSZA sewa atau beli, sekarang dah kenal pasti berdekatan pantai ada 13 unit untuk kita ambil. Kita akan tempatkan di situ sementara menunggu asrama baharu siap.

"UniSZA mempunyai hampir 10,000 pelajar iaitu 6,000 orang di kampus Gong Badak dan selebihnya di Kampus Tembila, Besut dan Kampus Kota, Kuala Terengganu," jelasnya.

Bagaimanapun katanya, masalah penginapan sedang diusahakan bersama dengan syarikat swasta yang dijangka bermula pada awal tahun hadapan.

"Keperluan asrama yang ada boleh muat 3,000 orang sedangkan di sini (kampus Gong Badak) ada 6,000 pelajar. Kita sedang bina asrama untuk memuatkan 3,000 orang lagi yang sudah ditenderkan kepada sebuah syarikat swasta dengan kos RM80 juta," katanya.



Beberapa buah bangunan sedang dalam pembinaan dan baik pulih dalam usaha menyediakan pelbagai kemudahan serta keselesaan kepada pelajar dan warga UniSZA. Gambar kecil: Yahaya.